



Ipse nova primus suffudit luce retexens,
 Omnes & fraudes sustulit, & tenebras,
 Gliscere verbosum fœvit quibus ante lyceum,
 Et vocum lites conferere omnigenas.
 Namque ubi dispexit nullam rem posse meando
 Uno eodemque statim tempore diffugere
 Per saltum abreptam, paullatim at sumere vires,
 Paullatim & sumptas ponere, perque gradus;
 Protinus edixit vim quoque in corpore inesse,
 Quæ modo in occursum dissita cuncta trahat,
 Ac modo, quum propius venere adtracta, repellat,
 Mutuo & attactu cuncta coire vetet.
 Partibus unde etiam nullis, nullaque figura
 Prædita materiæ scire elementa licet,
 Exigua, atque minuta, inter sese obsita inani,
 Hinc atque hinc hæere haud minus apta suo
 Usque trahentis, pellentisque in limite. Ita omnes
 Rerum corporeæ proveniunt species
 Dissimiles positu diverso principiorum,
 Diverso & qui eadem limite limes habet.
 Non ego sed tota si proluar Hippocrene,
 Non si Gorgoneo deferar altus equo,
 Omnia jam possim complecti arcana reperta,
 Dicere nec quanta hinc fluxerit utilitas,
 Quanta seges rerum, rebus quam certus & ordo
 Omnibus, & ratio scilicet, & species.
 Certius en multo jam nunc natura profatur,
 Quam Clarii sacro Pythia de tripode,
 Illius e scriptis, audax quæ carpere frustra
 Livor, & incani temporis arma volent.
 Hunc ne ego sic meritum non optem vivere longum,
 Cumæamque etiam vincere Deiphoben?
 Ah valeat, vigeatque: illum donate salute,
 Et rapidum nostros in mare ferte metus